

四庫全書

集部

欽定四庫全書

集部

王文成全書卷十七

詳校官中書臣沈 颺

中書臣劉源溥覆勘

總校官原任中允臣王燕緒

校對官助教臣羅萬選

謄錄監生臣毛 祀

欽定四庫全書

王文成全書卷十七

明 王守仁 撰

別錄

公移二

巡撫江西
征寧藩

牌行贛州府集兵策應

正德十四年
六月十八日

照得本院奉勅前往福建公幹於六月初九日自贛州啓行由水路十五日至豐城縣地名黃上腦節據知縣顧必等并沿途地方總甲等稟報江西省城突然變亂

撫巡三司等官俱遭拘執殺害遠近軍民甚是驚惶再
三阻遏本院且勿前進本院原未帶有官軍勢難輕進
欲馳還贛州起兵則地里相去益遠已暫回吉安府就
近住劄一面調集兵糧號召義勇一面差人分投爪探
的確另行外為此牌仰本府官吏照牌事理并行附近
衛所各行所屬起集父子鄉兵軍餘人等晝夜加謹固
守城池以保不測仍仰知府邢珣查將貯庫錢糧盡數
開具印信手本先行呈報毋得隱匿一面行取安遠等

縣原操不論上下班次官兵各備鋒利器械通到教場
日逐操練重加犒餉選委謀勇官員管領聽候本院公
文一至即刻就便發行敢有違誤定以軍法處治決不
輕貸

咨兩廣總制都御史楊共勤國難

節該欽奉勅福州三衛軍人進貴等脅衆謀反特命爾
暫去彼處地方會同查議處置衆奏定奪欽此欽遵於
六月初九日自贛啓行於本月十五日行至豐城縣地

名黃土腦據知縣顧似等稟稱本月十四日寧府將巡撫孫都御史許副使等官殺死巡按及三司府縣大小官員不從者俱被執縛各衙門印信盡數收去庫藏搬搶一空聲言直取南京一面分兵北上各官競阻本職不宜輕進本職自顧單旅危途勢難復進方爾回程隨有兵卒千餘已夾江並進來追偶遇北風大作本職亦張疑設計整舟安行兵不敢逼幸而獲免本月十八日回至吉安府據知府伍文定等稟稱地方無主乞留暫

為區畫遠近居民亦皆遮擁呼號隨又據臨江府并新
淦豐城奉新等縣各差人飛報寧府遣兵四出攻掠拘
收印信等因本職奉有前旨欲遂徑往福建但天下之
事莫急於君父之難若彼順流東下萬一南都失備為
彼所襲彼將乘勝北趨動搖京輔如此則勝負之筭未
有所歸此誠天下安危之大機慮念及此痛心寒骨義
不忍舍之而去故遂入城撫慰軍民督同知府伍文定
等調集兵糧號召義勇定謀設策收合渙散之心作起

忠義之氣牽其舉動而使進不得前搗其巢穴而使退無所據庶幾叛逆可擒大難可靖本職自惟弱劣多病屢疏乞休况地方之責亦非本職原任今茲扶疾赴闕實亦意圖便道歸省適當君父之急不忍失此事機姑復暫留期紓國難除具奏外為照前項事情係國家大難存亡所關雖經起調吉安等府兵快非惟武藝無素尤恐兵力不敷必須添調兵馬方克濟事照得南韶惠潮等府各有慣戰精兵堪以調用擬合移咨督發為此

合咨貴院煩為選取驍勇精壯兵快夫欵打手人等大約四五千名各備鋒利器械選委謀勇膽畧官員或就委嶺南道兵備僉事王大用監統給與各兵行糧不分雨夜兼程前來共勤國難諒貴院素秉忠孝之節又負剛大之氣聞此必將奮袂而起秉鉞長驅當在郭汾陽之先肯居祖士雅之後哉紛擾之中莫罄懇切惟高明速圖之

案行南安等十二府及奉新等縣募兵策應

六月二十

六
日

切照叛逆天下之大惡討賊天下之大義國家優禮藩
封恩德隆重乃敢輒萌異圖以干憲辟上逆天道下犯
衆怒滅亡之期計日可待本院職任雖非專責危難安
悉坐視仗順伐逆鼓率忠義豪傑四起發謀協力除行
吉安等府縣起調兵快防守地方及行廣東福建湖廣
等處各調兵策應外照得本省所屬各府州縣衛所見
今巡撫都布按等衙門俱各缺官事無統束擬合通行

為此仰抄案回府即行所屬縣分并衛所衙門各起調
官軍鄉兵固守城池保障地方仍一面分調兵快散布
關隘嚴加把截一面選募驍勇精兵大縣約四五千名
小縣約二三千名以上各備鋒利器械供給糧草擇委
能幹勇力官員管領操練其各項錢糧費用聽將在官
錢糧動支隨由本院查考其濱江去處多備船隻聽候
本院差官齎捧旗牌至日即刻依期啓行進攻仍選差
慣使人役多方探聽消息不時飛報以憑區畫此係守

上官員切責而臣子効忠致身正在今日各宜奮發義氣鼓動軍民共成滅賊之功以輸報國之念毋得違遠觀望失誤軍機自取罪戾

寬恤禁約

照得江西省城近遭變亂各府州縣兵戈騷動供億勞費兼值天時亢旱秋成無望人民窘迫言之痛心中間恐有無賴之徒乘機竊發驚擾地方理合寬恤禁約但巡撫衙門見今缺官本院駐軍境內不容坐視合就權

宜處置通行為此除一面奏聞外仰抄案回府照依案
驗內事理并行所屬各縣官員務須軫念地方痛恤民
隱凡一應不急詞訟工役俱各停止其軍前合用兵夫
糧草各官俱要持廉秉公親自編派毋得因而科擾及
聽信下人受財作弊仍嚴加曉諭軍民人等務要各守
本分安居田里不許扇惑搬移妄生事端大戶毋逼債
負小民毋激仇嫌鄉落居民各自會推家道殷實行止
端莊一人充為約長二人副之將各人戶編定排甲自

相巡警保守各勉忠義共勤國難敢有抗違生事驚擾
地方者就使拏解赴官治以軍法約長若有乘機侵害
衆戶及受財不舉許被害之人告發重治仍仰各縣將
前項寬恤禁約事宜翻刻告示發仰鄉村張掛曉諭俟
巡撫官員到日再行議處俱無違錯

獎瑞州府通判胡堯元擒斬叛黨

六月二十七日

據瑞州府通判胡堯元報稱擒獲從叛儀賓李蕃斬獲
叛黨九十四名等因者得逆賊稱亂天怒人怨誅滅非

久然今勢焰正張本官乃能獨奮忠勇首挫賊鋒遠近
聞之義氣自倍合行獎勞以勵人心為此牌仰瑞州府
官吏即行動支官錢買辦花紅羊酒委官率領官吏師
生送至本官用見本院獎勸之意其餘有功人員分別
等第量加犒賞被傷兵夫給與湯藥陣亡者厚恤其家
候功成之日通行造冊申報陞賞仍一面起調驍勇精
兵固守城池聽候本院調發毋得違誤

策應豐城牌

據豐城縣知縣顧似稟稱本縣起調鄉兵固守城池惟恐兵力不敷必須請兵策應庶保無虞等因者係地方重務已經調發龍泉安福永新等縣并吉安千戶所機快軍兵陸續前去策應照得發去官兵必須選委謀勇膽畧官員統領庶幾調度得宜為此仰通判楊昉即將後開軍兵名數督同千戶蕭英監統協同知縣顧似等計議攻守方畧相度險夷要害遠斥堠以防奸勤訓練以齊衆探知賊人入境即便設奇布伏以逸待勞擊其

不意務在先發制人毋令乘間抵隙軍兵人等務要嚴
為約束毋令侵擾敢有違犯退縮許以軍法從事各官
尤要同心并力協和行事共効忠貞之節以紓國家之
難如或執拗參錯觀望逗遛違犯節制致有疎虞軍令
具存決難輕貸

調取吉水縣八九等都民兵牌

訪得吉水縣八九等都民人王益題曾思温易弘爵王
昭隆等各户下人丁素習武勇人多尚義前任知縣周

廣曾經起調征進皆係驍勇慣戰之人今茲逆黨倡亂
民遭荼毒應合調取以赴國難為此訪差致仕縣丞龍
光齋牌前去吉水縣著落當該官吏即將各戶義兵照
數調集各備鋒利器械編成行伍僉選百長總小甲管
領就仰該縣查支官錢給與口糧暫且就屯本縣操演
武藝聽候本院指日東下隨軍進剿照得江西一省人
民久被寧府毒害侵肌削骨破家蕩產冤困已極控訴
無門今其惡貫滿盈天假義兵為民除暴尚聞愚昧之

徒阻避寧府威勢不敢舉動殊不知寧府未叛之前尚為親王人不敢犯今逆謀既著即係反賊人人得而誅之復何所憚爾等義民正宜感激忠義振揚威武為百姓報讐泄憤共立不世之勲以收勤王之績毋得稽遲觀望自取軍法重究差去官員不許假此擾害妄生事端體訪得出罪不輕貸

預備水戰牌

案照已經行仰起調軍馬前來策應日久尚未見到近

據探報逆黨南下將攻南都計此時南都必已有備各
逆黨進無所獲必退保九江如此則水戰之具為急不
可不備為此牌仰福建布政司即行選募海滄打手一
萬名動支官庫不拘何項銀兩從厚給與衣裝行糧各
備鋒利器械就仰左布政使席書兵備僉事周期雍自
行統領星夜前赴軍門相機前進并力擒剿仍行巡撫
等衙門同心協力後先監督應援此係叛逆謀危宗社
天下荼毒所關呼吸存亡旦暮成敗間不容髮非比尋

常賊情不得遲遣觀望有虧臣節嗚呼主憂臣辱主辱臣死凡有血氣孰無是心况各官忠義自任剛大素聞必將奮臂疾驅有不容已兵快及領兵人等敢有違犯節制有誤軍機者仰即遵照本院欽奉勅諭事理許以軍法從事無得姑息

咨都察院都御史顏權宜進剿

七月初五日

節該欽奉云云除具題及咨南京兵部知會外為照前項事情係國家大難安危所關已經起調吉安等府兵

快前去征剿并備行湖廣廣東福建各調兵策應外照得南畿係朝廷根本重地今寧王謀逆構亂舉兵北行圖據南都必得四面合攻庶克有濟及照貴院奉命行勘前事即今逆跡已露別無可勘事情合咨前去煩為隨處行令所屬選取驍勇精兵及民間忠義約二三萬名選委謀勇官員分領會約鄰近省郡合勢刻期進討仍煩貴院親督兼程前來共勤國難諒貴院平日忠義存心剛直自許况今奉命查勘寧藩正可權宜行事號

召遠邇主憂臣辱主辱臣死他復何言紛擾之中莫罄懇切惟高明速圖之

權處行糧牌

據撫州府申稱建昌撫州廣信饒州四府正德十三年兌軍糧米不下十餘萬石原蒙撥在龍窟聽與撫州建安鉛山廣信饒州五所軍旗交兌因運船阻凍回遲於今年六月始行較斛開兌其已兌者裝載軍船未兌者仍在民艘不意十五日省城有變遂行停兌至十八日

逆黨乘機劫奪各船順流放至饒州河下得無驚擾但今江河梗塞難以兌運節奉明文動調大軍征討叛逆要將兌軍淮糧暫留以備軍餉申詳到院查得先據吉安等府申稱為各府官軍將臨欲將官庫紙米贓罰等銀并京庫等銀及將兌淮糧米從權給支借用等情已經批仰依擬查取去後今申前因擬合准行為此仰府官吏即行掌印官查將見在饒州灣泊兌軍淮糧准從權宜坐委能幹官員無分雨夜督運江西省城聽候支

給各兵行糧毋違時刻候事平之日備造印信文冊繳
報查照仍令委官前去查照免致下人因而侵欺未便

牌行吉安府敦請鄉士夫共守城池

七月初八日

照得寧府反叛本院調兵進剿即日啓行各府縣掌印
正官既該統兵前進所據各該府縣城池雖已行委各
佐貳官防守但艱危之際事變不測必須歷練老成之
人相與維持鎮定庶幾人心不致驚疑政務有所倚賴
為此案行吉安府官吏通行各縣署印官員徑自以禮

敦請老成鄉宦衆所推服者一二員在城以備緊急協
同行事該府城池關係尤重查得致仕按察使劉遜素
有才望忠義奮激就仰該府請至公館仍仰署印官待
以賓師之禮托以咨決之事一應軍機事宜咨稟計議
而行以安人心以濟大事仍行本官務以國家大難為
心盡心竭力共圖殄賊毋以休致自嫌諒朝廷報功之
典當亦自不相負如誤大事咎亦有歸通無違錯

牌行各哨統兵官進攻屯守

七月十七日

仰一哨統兵官吉安府知府伍文定即統部下官軍兵快四千四百二十一員名進攻廣潤門就留兵防守本門直入布政司屯兵分兵把守王府內門

仰二哨統兵官贛州府知府邢珣即統部下官軍兵快三千一百三十餘員名進攻順化門就留兵防守本門直入鎮守府屯兵

仰三哨統兵官袁州府知府徐璉即統部下官軍兵快三千五百三十員名進攻惠民門就留兵防守本門直

入按察司察院屯兵

仰四哨統兵官臨江府知府戴德孺即統部下官軍兵快
新喻二縣三千六百七十五員名進攻永和門就留兵
防守本門直入都察院提學分司屯兵

仰五哨統兵官瑞州府通判胡堯元童琦即統部下官
軍兵快四千員名進攻章江門就留兵防守本門直入
南昌前衛屯兵

仰六哨統兵官泰和縣知縣李楫即統部下官軍兵快

一千四百九十二員名夾攻廣潤門直入王府西門屯
兵守把

仰七哨統兵官新淦縣知縣李美即統部下官軍兵快
二千員名進攻德勝門就留兵防守本門直入王府東
門屯兵守把

仰中軍營統兵官贛州衛都指揮余恩即統部下官軍
兵快四千六百七十員名進攻進賢門直入都司屯兵
仰八哨統兵官寧都知縣王天與即統部下官軍兵快

一千餘員名夾攻進賢門留兵防守本門直入鐘樓下屯兵

仰九哨統兵官吉安府通判談儲即統部下官軍兵快一千五百七十六員名夾攻德勝門直入南昌左衛屯兵

仰十哨統兵官萬安縣知縣王冕即統部下官軍兵快一千二百五十七員名夾攻進賢門就守把本門直入陽春書院屯兵

仰十一哨統兵官吉安府推官王晞即統部下官軍兵
快一千餘員名夾攻順化門直入南新二縣儒學屯兵
仰十二哨統兵官撫州通判鄒琥知縣傅南喬即統部
下官兵三千餘員名夾攻德勝門就留兵防守本門隨
於城外天寧寺屯兵

承委官員務要竭忠奮勇擒剿叛逆以靖國難如或退
縮觀望違犯節制定以軍法論處軍兵人等敢有臨陣
退縮者就仰本官遵照本院欽奉勅諭事理就於軍前

斬首示衆牌候事完日繳

告示在城官

七月十八日

照得寧王造謀作亂神人共憤法所必誅在城宗支郡王儀賓皆被逼脅如鍾寧王無罪削爵建安王父子俱死軍民人等或覆宗滅族或蕩家傾產或勒取子女皆恨入骨髓敢怒而不敢言今日之事豈其本心本院仰仗朝廷威靈調集兩廣并本省狼達漢土官兵二十餘萬即日臨城亦無非因民之怨惟首惡是問告示至日

宗支郡王儀賓各閉門自保商賈買賣如故軍民棄甲
投戈各歸生理無得驚疑該府內臣校尉把守人員開
門出首或反兵助順擒斬首惡一體奏聞陞賞其有懷
奸稔惡從逆不悛者必殺不赦凡我良善軍民即便去
惡從善毋陷族滅故示

示諭江西布按三司從逆官員

照得寧王悖逆天道造謀作亂殺戮大臣都布按三司
官員各悚於暴虐保其妻子以致臨難之際不能自擇

或俛首幽囚或甘心降伏貪生畏死反面事仇春秋之義雖嚴於無將之誅而志圖興復者尚不恣於峻絕探得各官見今在城閉門自訟者有之臨城巡關者有之出入府庫運籌畫策者有之此皆大義未分孤立無助揆之法理固不容誅推之人情實為可憫即今本院統集狼達漢土官軍二十餘萬後先臨城各官果能去逆歸順尚可轉禍為福故今特遣牌諭兵臨之日仰各開門出首仍一面將本院發去告示給散張掛撫諭良善

百姓宗支儀賓人等各閉門自保毋輕出街市橫遭殺戮該府把守內臣校尉人等亦各諭以大義俾知背逆向順尚可免死投甲釋戈蓬頭面縛候本院臨審定奪敢有從惡不悛執迷不悟拒敵官兵者必殺無赦仍具改正緣由親齎投首以憑施行毋得遲違自取族滅牌具依准繳來

告示七門從逆軍民

七月二十一日

督府示諭省城七門內外軍民雜役人等除身犯黨逆

不赦另議外其原被寧府迫脅偽授指揮千百戶校尉
護衛及南昌前衛一應從亂雜色人役家屬在省城者
仰各安居樂業毋得逃竄有能寄聲父子弟改過遷
善擒獲首惡請軍門報捷者一體論功給賞逃回報首
者免其本罪仍仰各地方將前項人役一名名赴合該
管門官處開報令各親屬一名每五日一次打卯其有
收藏軍器許盡數送官各宜悔過毋取流亡

牌行江西二司安葬寧府官眷

照得寧王造反稱兵向闕行委偽官萬銳等把守省城
音信不通本院所行告示負固不納以致討賊安民之
義俱未知悉及至統兵攻城該府官眷一聞銃砲震響
閉門縊死燒焚宮室雖寧王背逆罪在不赦而朝廷惇
睦之仁何所不至本院已同宗支并原任布按二司及
吉安等府知府等官伍文定等親赴該府驗看未焚庫
藏已封號訖所據各官眷身屍相應埋葬為此合行案
仰布按二司即便啓知建安王選委各郡王府老成內

使火者三四員會同南昌府南新二縣官措置棺木以禮安葬毋得違錯不便

手本南京內外守備追襲叛首

七月二十三日

本年七月二十日准欽差南京內外守備揭帖內開煩念南京根本重地宗廟陵寢所在作急整點精銳軍兵數萬名擇將統領星夜兼程前來粘蹤追襲攻擊其後保固根本重地所統官軍煩沿途經過去處應付廩給口糧馬匹草料事寧之日獲功官軍具奏陞賞請勿遲

延等因卷查先為飛報地方謀反重情事照得本院奉
勅前往福建地方公幹行至豐城縣聞寧府謀反遂返
吉安住劄者係謀危宗社重情隨即具題并行吉安贛
州等府起調官兵俟釁而發及咨南京兵部并巡撫應
天都御史李煩為通行在京大小衙門會謀集議作急
繕完城守簡練舟師設伏沿江旁檄列郡先發操江之
兵聲義而西約會湖相互為犄角本院亦砥鈍策駕牽
躡其後以義取暴以直加曲不過兩月之間斷然一鼓可

縛去後續據本院爪探人役回報寧王已下南京留有
逆黨內官驅脅官民人等一萬餘員名固守城池虐焰
昌熾阻絕往來等因又經節催府縣兵快分布哨道親
自統領刻期於七月二十日寅時直抵省城進攻仍被
逆黨砌塞城門分兵固拒當幸官兵用命奮勇攻破城
門各賊遂皆奔潰當即分兵擒搜及差人分投爪探叛
首向往的確并發官兵前去追襲外今准前因合用手
本前去煩為查照施行

咨兩廣總督都御史楊停止調集狼兵

案照本院看得前項事情係國家大難存亡所關雖調各府兵快非惟武藝無素尤恐兵力不敷即隨備咨欽差總督右都御史楊煩為選取驍勇兵快大約三五千名就委嶺南道兵備僉事王大用監統給與各兵行糧兼程前來共勤國難及行廣東布政司轉行各道并呈鎮守撫按等衙門一體查照知會去後節據知縣顧似等報寧王已下南京留有逆黨內官驅脅官民人等一

萬餘員名固守城池阻絕往來等情隨該本院催督所調兵快分布哨道親自統領刻期於七月二十日寅時直抵省城進攻仍被逆黨砌塞城門分兵固拒當幸官兵用命奮勇攻破城門各賊遂皆奔潰隨即分兵搜擒外今照前項事情見該欽命京邊官軍二十餘萬前來會剿及本院見統官兵五萬餘員名俱在江西省城即今分遣委官監督前去約會併勢追襲所據原調廣東土漢狼兵人等未審曾否齊集但今南贛吉安南昌等

處沿江人民俱各畏懼狼兵悉皆驚惶及又訪得狼達
土兵曾受寧王贓物私許助謀効力今調各兵本以為
國除害惟恐返為民害不無有誤大事擬合停止為此
合行移咨貴院煩為查照希將起調兵快停留本省應
用施行

牌行撫州知府陳槐等收復南康九江

七月二十
四日

照得寧王謀反興兵向闕南康九江見被攻破分留逆
黨據守二府城池意圖西扼湖兵之應援南遏我師之

追躡仰賴宗社威靈克復省城除遣知府伍文定等分
布哨道邀擊寧賊務在得獲外所據逆黨占據府縣應
合分兵勦復為此牌仰知府陳槐等各選精兵身自統
領星夜前去南康九江地方相機行事務要攻復城池
平靖反側仍將地方人民加意賑恤激以忠義撫以寬
仁權舉有司之職以理庶事查處倉庫之積以足軍資
一面分兵邀誘寧賊毋令東下并差人爪探飛報軍門
各官務要同心併力協和行事毋得人懷一心彼此參

錯致誤事機兵快人等敢有違犯節制者仰照本院欽奉勅諭事理以軍法從事一應事機呈稟往復慮有稽緩俱聽一面從宜區畫一面呈報軍門仍備查各官棄城逃走致賊焚掠屠戮之故具由申報以憑叅拏究治

犒賞福建官軍

據福建按察司整飭兵備兼管分巡漳南道僉事周期雍呈稱依奉本院案驗起取上杭等處軍兵共五千餘名分委指揮劉欽知縣邢暄等及起取漳州府海滄打

手三千餘名行委通判李一寧等管領本道躬親統督
先後啓行前來等因到院案照先為飛報地方謀反重
情事看係國家大難存亡所關隨即備咨南京兵部及
巡撫兩廣湖廣等衙門并福建三司等官選取驍勇兵
快選委謀勇官員監統兼程前來共勤國難去後今據
前因者得逆賊已經成擒餘黨悉漸殄滅除將各該官
兵先行發回外切照福建漳南相距江西省城約計程
途有一千七八百里之遙該道乃能不滿旬月調集官

軍兵快八千員名之衆首先各省而至足見本官勇畧
多謀預備有素忠義之誠足以感激人心敏捷之才足以
綜理庶務故一呼而集兼程赴難除另行旌獎外及照
調來官兵衝冒炎暑遠赴國難忠義既有可嘉勞苦尤
為足憫合加犒賞以勵將來為此除將支出官銀差官
領齋該道仰抄案回司即將原調領兵官員并軍兵鄉
夫人等酌量犒賞用見本院獎勞之心以為將來忠勤
之勸仍仰該道備查各兵原係操練者照舊在班操練

以備緊急調用添募者省令回還田里各安生業務為良善之民共享太平之福毋得分外為非致招身家之累備行巡按衙門知會

釋放投首牌

據吳國七林十一等口稱閔念四等落水身死今訪得閔念四等見在寧州界上告要投招前者已曾發有告示許令脅從新民俱准投首免死給照復業生理近日朝廷降有黃榜亦准投首免死今聞各地方居民不體

朝廷及本院好生之意輒便起兵勦殺激使不敢出身
投首反使朝廷及本院失信於人本當綁拿重究姑且
再行誠諭為此牌仰寧州知州汪憲探訪前項一起投
首之人是否閔念四等正身若果有投首真情即便帶
領前赴軍門發落准與楊子橋等一例釋放給與執照
各自復業當差如或聚衆不散星夜飛報軍門以憑發
軍勦滅俱毋違錯

牌仰沿途各府州縣衛所驛遞巡司衙門慰諭軍

民

照得先因寧王謀反請兵征剿續該本院親督各哨於七月二十日攻復省城二十四等日在鄱陽湖連日與賊大戰至二十六日遂將寧王俘執及其謀黨李士實等賊首林十一等俱已前後擒獲餘黨蕩平地方稍靖已於本月三十日具本奏捷訖近因傳報京軍復來愚民妄相逃竄往往溺水自縊本院親行撫諭尚未能息殊不知朝廷出兵專為誅剿寧賊救民水火之中况統

兵將帥皆係素有威望老臣宿將紀律嚴明遠近素所稱服縱使復來亦必自無擾害況今寧賊已擒地方已靖京軍豈有無事遠涉之理愚民無知轉相驚惑深為可憫誠恐沿途一帶居民亦多聽信傳聞不實之言而北來京軍尚或未知寧王已就擒獲合行差官沿途曉諭軍民及一面迎候北來官兵煩請就彼回轉除將寧王反逆黨與本院親自量帶官兵徑從水路解赴京師外仰沿途軍衛有司驛遞等衙門照牌事理即行抄牌

備出告示曉諭遠近鄉村軍民人等使知寧賊已擒京軍已轉免致驚疑釀成他變差去官員仍仰程程護送同與迎候京軍堅請就彼回轉以免沿途百姓供給之苦仍諭以本院押解賊犯量帶官兵皆自備行糧廩給沿途經過有司等衙門止備人夫牽拽船隻及畧供柴草給付各兵燒用其他一無所擾不得因此科害里甲軍民差去官員晝夜前進毋得在途遲滯抄牌官吏各俱依准候本院經過日繳

案行江西按察司停止獻俘呈

據江西按察司呈奉欽差提督軍務御馬監太監張劄
付內開會同欽差提督軍務平賊將軍充總兵官左都
督朱議得止兵息民不為無見但照奔潰黨惡見該各
屬日報嘯聚流劫亦非已靖黨惡閔念四等又係職等
行文之後拿獲之數亦或尚多撫按守臣當此新亂之
餘正宜留心撫綏地方聽候勦明解京良由不知前因
固執一見輒要自行獲解私請回師再照妃媵係宗藩

眷屬外官押解恐有妨礙設或越分擅為咎歸何人職等體念民力不堪供給軍餉責令將官將所領官兵分布各府住劄聽掣當職止帶合用叅隨執打旗號等項人員徑趨江西公同巡撫等官查驗巢穴及遍給告示曉諭撫安地方一面具請定示另行除差委錦衣衛都指揮僉事馬驥前來外劄仰本司各該官吏照依劄付內事理即便遵照鈞帖內事理備行巡撫都御史王等將已獲賊犯留彼聽候明旨欽遵施行等因備呈到院

卷查先為飛報地方謀反重情事云云本職將寧王并
其逆黨親自量帶官兵徑赴水路照依原擬日期啓行
解赴京師已至廣信地方今准前因為照前項逆黨俱
已擒獲其餘脅從遵照欽降黃榜事例俱已許令投首
解散宗藩眷屬俱係取到各將軍府內使管伴監守保
無他嫌今欽差提督贊畫機密軍務御用監太監張及
欽差提督軍務御馬監太監張欽差提督軍務平賊將
軍充總兵官左都督朱憂國愛民之心素聞遠近况號

令嚴明秋毫無犯今來體勘逆賊巢穴果已破平百姓
貧困顛連必能大加撫諭安輯以仰布朝廷懷惠小民
之仁本職縱使復回省城亦安能少効一籌不過往返
道途遠誤奏過程期有損無益為此仰抄案回司著落
當該官吏照依案驗內事理即便備呈前去煩請徑自
查照施行

咨兵部查驗文移

照得本職已將寧王宸濠并其黨與及宮眷人等照依

原擬具奏日期起程親自解赴闕下間隨據南康府申
并江西按察司呈各奉欽差提督軍務御馬監太監張
劄付內開訪得宸濠已該本職擒獲克復省城等語未
曾親到江西又無堪信文移止是見人傳說遽難憑據
况係宗藩人衆中間恐有撥置同謀逆黨未盡等因及
節准欽差提督贊畫機密軍務御用監太監張揭帖開
稱將各犯委的當人員用心防守調攝飲食獻俘闕下
會官封記庫藏俱候按臨地方區畫等因又准欽差提

督軍務充總兵官安邊伯朱手本開稱即查節次共擒斬叛賊級若干內各處原奏報有名若干無名若干有名未獲漏網并自首及得獲馬騾器械等項各若干連獲官軍衛所職役姓名備查明白俱各存留江西省城聽候審驗仍查餘黨有無奔潰及曾否殄滅盡絕緣由通行開報以憑回報等因各到職為照宸濠并其同謀黨與俱已擒獲餘孽亦就誅戮雖有脇從數亦不多皆非得已隨即遵奉欽降黃榜曉諭俱赴所在官司投首

解散其庫藏等項該本職會同多官於未准揭帖之先
眼同封貯在官聽候命下定奪官軍兵快擒斬功次見
該原經奏留兩廣監察御史謝源伍希儒查造奏繳及
照宸濠并各重犯官眷人等見解廣信地方設若往返
恐致疎虞及違誤本職奏報原擬日期除照舊督解前
赴闕下獻俘以昭聖武及具揭帖各另回覆外今照前
因照得本職繆當軍旅重寄地方安危所關三軍死生
攸係一應事機若非奉有御寶勅旨及兵部印信咨文

安敢輕易憑信今前項各官文移既非祖宗舊章成憲
就使果皆出於上意亦須貴部行有知會公文萬一奸
人假托各官名目乘間作弊致有不測變亂本職雖死
亦何所及除奉欽差總督軍務威武大將軍總兵官後
軍都督府太師鎮國公朱鈞帖曾奉朝旨相應遵奉其
餘悉遵舊章施行外緣前項各官文移未委虛的俱合
備行咨報貴部為此備抄揭帖粘連咨請查驗施行

案行浙江按察司交割逆犯暫留養病

九月初

照得當職先因患病具本乞休間奉勅扶病前往福建
公幹六月十五日行至江西豐城地方適遇寧王興兵
作亂者係君父大難義不忍去復回吉安府督同知府
伍文定等起調兵夫招集義勇扶病親行統領於七月
二十日攻復省城本月二十四五六等日於鄱陽湖連
日大戰擒獲寧王宸濠及逆黨李士實劉養正王春等
賊首吳十三凌十一閔念四吳國七閔念八等先後具
本奏報外隨聞大駕南征禮當解赴軍門又因宸濠連

日不食慮恐物故無以獻俘奏凱彰朝廷討賊之義兼之合省内外人情洵洵或生他變當具本題知於九月十一日啓行將宸濠及逆黨官眷解赴軍門當職力疾沿途醫藥親行押解行至廣信地方又奉欽差總督軍務鈞帖備仰照依制諭內事理即便轉行所屬司府衛所州縣驛遞等衙門欽遵施行等因遵依通行間續准欽差提督軍務御馬太監張照會及准欽差總督軍務充總兵官安邊伯朱手本各遣官邀回本職并將所解

宸濠等逆犯回省聽候會審本職看得既奉總督軍門
鈞帖自合解赴面受節制若復退還省城坐待駕臨恐
涉遲謾且誤奏過程期又復扶病日夜前進行至浙江
杭州府地方前病愈加沉重不能支持請醫調治間適
遇欽差提督贊畫機密軍務御用監太監張奉命前來
江西體勘宸濠等反逆事情及查理庫藏宮眷等事當
准鈞帖開稱宸濠等待親臨地方覆審明白具奉軍門
定奪等因為照本職先因父老祖喪累疏乞休未蒙俞

允隨扶病赴闕意圖了事即從彼地冒罪逃歸旬日之前亦已具奏不意行至中途遭值寧王反叛此係國家大變臣子之義不容舍之而去又闔省巡撫地方等官無一人見在天下事機間不容髮故復恐死暫留為牽制攻討之圖候命師既至地方稍靖即從初心死無所避臣區區報國血誠上通於天不辭滅宗之禍不避形迹之嫌冒非其任以勤國難亦望朝廷鑒臣此心不以法例繩縛使得少申烏鳥之私等情具奏外今照前事

本職自度病勢日重猝未易愈前進既有不能退回愈
有不可若再遲延必成兩誤除本職暫留當地請醫調
治俟稍痊可一面仍回省城或仍前進沿途迎駕一面
具本乞恩養病另行外所據原解逆犯合就查明交割
帶回省城聽候駕臨審處通行為此仰抄案回司著落
官吏備呈欽差提督軍務贄畫機密軍務御用監太監
張頰請會同監軍御史公同當省都布按三司等官將
見解逆首宸濠及逆黨劉吉等各犯并宮眷馬匹等項

逐一交查明白仍請徑自另委相應官員兵快人等管押帶回省城從宜審處施行仍備呈兵部查照知會抄案依准并行過日期先行呈來

告諭軍民

十二月十五日

告諭軍民人等爾等困苦已極本院才短知窮坐視而不能救徒含羞負愧言之實切痛心今京邊官軍驅馳道路萬里遠來皆無非為朝廷之事拋父母棄妻子被風霜冒寒暑顛頓道路經年不得一顧其家其為疾苦

殆有不忍言者豈其心之樂居於此哉况南方卑濕之地尤非北人所宜今春氣漸動瘴疫將興久客思歸情懷益有不堪爾等居民念自己不得安寧之苦即須念諸官軍久離鄉土拋棄家室之苦務敦主客之情勿懷怨恨之意亮事寧之後凡遭兵困之民朝廷必有優恤今軍馬塞城有司供應日不暇給一應爭鬪等項詞訟俱宜含忍止息勿輒告擾各安受爾命寧耐爾心本院心有餘而力不足聊布此苦切之情於爾百姓其各體

悉無怨

欽奉詔書寬宥脅從

節該伏覩詔書朕親統六師正名討罪除首惡宸濠并同謀有名逆賊不赦外其餘脅從之徒盡行寬宥釋放欽此欽遵照得先因寧府作亂該本院出給告示官兵臨城之日惟首惡是問宗支郡王儀賓人等各閉門自保商賈買賣如故軍民棄甲投戈各歸生理毋得驚疑其有懷奸稔惡不悛者必殺無赦脅從人等但能赴官

投首即與釋放免罪等情已經發仰遠近張掛曉諭外
後宸濠既擒被脅之徒前後赴官投首不下千餘皆經
查審釋放其間尚有欲赴首官司多被地方攔阻本院
隨又督解逆犯出外以是一向遲疑未即出投續該欽
差提督軍務各衙門臨省前項被脅之人始各赴官投
首就與本院事體一同即是去惡從善之民近訪得有
等無籍之徒用言扇惑乘機詐害致使驚疑未安生理
除訪拏究問外仰按察司抄捧回司即便大書出給告

示發仰人煙輳集去處常川張掛曉諭自破城以後但有被脅旗校軍民人等改惡遷善已經赴官投首驗有執照者皆係良善俱仰遵照前項詔書內事理盡行寬宥釋放各安生理毋得信人恐嚇自生猜疑地方里鄰總甲人等敢有懷挾私讐羅織擾害誑言扇惑詐騙財物者仰即赴院告理以憑拏問發遣仍取各首到官姓名并給過告示曉諭緣由呈報

批追徵錢糧呈

據江西布政司呈者得江西一省重遭大患民困已極
屢經奏免糧稅日久未奉明旨近因南科奏停隨復部
使催督一以為蠲免一以為追徵非惟下民無所遵守
亦且官府難於施行今該司議謂兌准起運係京儲額
數而王府祿米亦歲月難缺要行所屬先納兌准次及
京庫折銀次及南京倉米次及王府祿米其餘俱候明
降等因此亦深觀民患欲濟不能委曲調停計出無奈
仰司即如所議備行各該府州縣查照施行後有恩旨

當亦止免十五年以後錢糧其十四年以前拖欠必須帶徵終有不免莫若速了為便各府州縣宜以此意備曉下民姑忍割肉之痛以救燃眉之急嗚呼目擊貧民之疾苦而不能救坐視徵求之急迫而不能止徒切痛楚之懷曾無拯援之術傷心慘目汗背赧顏此皆本院之罪其亦將誰歸咎各府州縣官務體此意雖在催科恒存撫字仍備出告示使各知悉此繳

再批追徵錢糧呈

據江西布政司呈看得本省十四年以前一應錢糧已
經給事等官奉奏明旨果係小民拖欠俱准暫且停徵
還著各該官司設法賑濟毋視虛文此朝廷之深仁厚
德憫念窮民誠愛惻怛之所發小民莫不歡欣鼓舞臣
子所當遵守奉行乃今停徵之令甫下而催併之檄復
行賑濟之仁未布而箠撻之苦已加法令如此有司何
以奉行下民何所取信夫為人臣者上有益於國下有
益於民雖死亦甘為之今日所行上使朝廷失信於民

下使百姓歸怨於上重貧民之困益地方之災縱使錢糧果可立辦忍心害理亦不能為况旬月之間而欲追併了絕就使神輸鬼運亦於事勢不能徒使斂怨殃民何益於事除本院身為巡撫不能為國為民自行住俸待罪外仰布政司行各該府縣官以理勸化小民且諭以今日之舉非關朝廷失信實由京儲缺乏司國計者勢不得已興起其忠君親上之心勉令漸次刻期完納果克濟事兩月之後亦未為遲其各該官員本非其罪

不必住俸革去冠帶行令照舊盡心職業勿因事變之
難有灰愛民之志後有違慢之戮本院自當其罪仍呈
提督漕運行督糧官及巡按衙門知會此繳

批南昌府追徵錢糧呈

據南昌府所申凋弊徵求之苦本院繆當斯任實切憂
慚部堂諸公非無恤民之念但身司國計不得不以空
乏為虞在外有司非無國計之憂但目擊民瘼不能不
以撫恤為重若使平民尚堪腹削一時忍痛并徵以輸

國用豈非臣子之心但恐徒爾虐民無濟國事非徒無濟兼恐生虞斟酌調停事在善處仰布政司會同二司各官將該府所申事理即加酌議或先徵新糧將舊糧減半帶徵或儘其力量可及分作幾限令民依期逐漸辦納但可通融調攝皆須悉心議處務使窮民不致重傷而國用終亦無損一面備行各該府縣查照施行一面具由呈來以憑咨奏此繳

褒崇陸氏子孫

正德十五年正月

據撫州府金谿縣三十六都儒籍陸時慶告者得宋儒
陸象山先生兄弟得孔孟之正傳為吾道之宗派學術
久晦致使湮而未顯廟堂尚缺配享之典子孫未沾褒
崇之澤仰該縣官吏將陸氏嫡派子孫差役查照各處
聖賢子孫事例俱與優免其間有聰明俊秀堪以入學
者具名送提學官處選送學肄業務加崇重之義以扶
正學之衰具依准繳

告諭安義等縣漁戶

告諭安義縣等漁戶及遠近軍民人等地方不幸近遭
大變加以師旅征輸人民困苦已極官府思欲休養賑
恤而無其由近聞漁戶人等曾被寧王驅脅者慮恐官
府追論舊惡心不自安往往廢棄生業詢其所以皆由
寧家煽動意在激使為惡因而陷之死地以快其憤不
知朝廷已屢有榜文凡被寧賊驅脅者一槩釋而不問
况訪得安義等處漁戶各係詩禮大家素敦良善雖或
間有染於非僻及為王府所脅誘者然鄉里遠近自有

公論善惡終不可混近據通判林寬稟稱各戶痛懲既
往已將漁船折卸似此誠心改行亦復何所憂懼為此
特仰南康府通判林寬將本院告諭真寫翻刊親齎各
戶逐一頒諭務使舍舊圖新各安生理不得輕信人言
妄有疑猜自求罪累其素敦詩禮良善者愈加勸勉務
益興行禮讓講信修睦以為改惡從善者之倡族黨之
中果有長惡不悛不聽勸諭者衆共拘執送官明正典
刑以安善類毋容稂莠致害嘉禾若舊雖為顯惡今能

誠心改化者亦不得懷記舊讐搜求羅織激使為非事
發究竟責有所歸嗚呼吾民同胞不幸陷於罪戮惻然
尚不忍見豈有追尋舊惡必欲置之死地之理本院舊
在南贛曾行十家牌式軍民頗安盜賊頗息除各該地
方行分巡分守官編置外前項漁戶人等就仰通判林
寬照式逐一編置務在著實舉行以收成效特茲告諭
各宜知悉

批按察使伍文定患病呈

據江西按察司呈看得按察使伍文定茂著戎功新膺
憲命當其衆難交攻尚以一身獨任偶茲微恙豈妨供
職諒本官自切百姓瘡痍之憂豈遑一身痛痒之顧仰
該司即行本官照舊管事果有疾患一面調理毋得再
呈辭致曠職業繳

批臨江府耆民建立生祠呈

據臨江府清江縣耆民董惟謙等呈立知府戴德孺生
祠看得知府戴德孺素堅清白之守久著循良之政今

其去任而郡民建祠報德此亦可見天理之在人心自不容已仰該府縣官俯順民情量行撥人看守非徒激勵後人俾有所興且以成就民德使歸於厚繳

批吉安府救荒申

據吉安府申備廬陵縣申看得所申要將陳腐倉穀賑給貧民此本有司之事當茲災患正宜舉行但誠於愛民者不徒虛文之舉忠於謀國者必有深長之思故目前之災雖所宜恤而日後之患尤所當防以今事勢而

觀後患決有難測近據崇仁縣知縣祝鰲申要將預備倉穀凶荒之時則倍數借給以濟貧民收成之日則減半還官以實儲蓄頗有官民兩便已經本院批准照議施行看得各縣事體不甚相遠此議或可通行仰布政司再加裁酌議處施行各屬遇災地方凡積有稻穀者俱查照此議而行仍仰各該掌印官務要身親給散使貧民得實惠之沾官府無虛出之弊乃可其一應科派物料等項當茲兵亂之餘加以水災民不聊生豈堪追

併仰布政司酌量緩急分別重輕畧定徵收先後之次
備行各屬以漸而行庶幾用一緩二之意少免醫瘡剝
肉之苦通仰該司定議施行回報

批撫州府同知汪嵩乞休呈

據撫州府同知汪嵩呈看得同知汪嵩久存恬退遇難
復留以盡報國之忠仍堅歸田之請出處得宜誠可嘉
尚但本官政素獲民年未甚老已經勉留照舊供職而
本官稱疾愈篤求退益懇仰府再行查看如果病勢難

留准令就彼致仕該府以禮起送還鄉仍備行原籍官司歲時以禮優待務獎恬退以勵鄙薄此繳

批提學僉事邵銳乞休呈

據江西按察司呈者得提學僉事邵銳求歸誠切堅守考槃之操而按察使伍文定挽留懇至曲盡緇衣之情是亦人各有志可謂兩盡其美然求歸者雖亦明哲保身使皆絜身而去則君臣之義或幾乎息挽留者雖以為國惜賢使皆覲顏在位則高尚之風亦日以微况本

院自欲求退而未能安可沮人之求退仰該司備行本
官再加酌量於去就之間務求盡合於天理之至必欲
全身遠害則掛冠東門亦遂聽行所志若猶眷顧宗國
未忍割情獨往且可見危授命同舟共艱稍須弘濟却
遂初心則臨難之義既無苟免於搶攘之日而恬退之
節自可求伸於事定之餘興言及此中心愴切

禮取副提舉舒芬牌

照得當職奉命提督軍務兼理巡撫深慮才微責重無

以仰稱任使合求賢能以資贊翼訪得福建市舶提舉
司副提舉舒芬志行高古學問深醇直道不能趨時長
才足以濟用合就延引以匡不及為此牌仰福建布政
司官吏即行泉州府措辦羊酒禮幣費送本官用見本
院優禮之意仍照例起關應付前赴軍門以憑諮訪本
官職任就委別官暫替

南贛鄉約

咨爾民昔人有言蓬生麻中不扶而直白沙在泥不染

而黑民俗之善惡豈不由於積習使然哉往者新民蓋常棄其宗族畔其鄉里四出而為暴豈獨其性之異其人之罪哉亦由我有司治之無道教之無方爾父老子弟所以訓誨戒飭於家庭者不早薰陶漸染於里閭者無素誘掖獎勸之不行連屬叶和之無具又或憤怨相激狡偽相殘故遂使之靡然日流於惡則我有司與爾父老子弟皆宜分受其責嗚呼往者不可及來者猶可追故今特為鄉約以協和爾民自今凡爾同約之民皆

宜孝爾父母敬爾兄長教訓爾子孫和順爾鄉里死喪
相助患難相恤善相勸勉惡相告戒息訟罷爭講信修
睦務為良善之民共成仁厚之俗嗚呼人雖至愚責人
則明雖有聰明責已則昏爾等父老子弟毋念新民之
舊惡而不與其善彼一念而善即善人矣毋自恃為良
民而不修其身爾一念而惡即惡人矣人之善惡由於
一念之間爾等慎思吾言毋忽

一同約中推年高有德為衆所敬服者一人為約長二

人為約副又推公直果斷者四人為約正通達明察者
四人為約史精健廉幹者四人為知約禮儀習熟者二
人為約贊置文簿三扇其一扇備寫同約姓名及日逐
出入所為知約司之其二扇一書彰善一書糾過約長
司之

一同約之人每一會人出銀三分送知約具飲食毋太
奢取免饑渴而已

一會期以月之望若有疾病事故不及赴者許先期遣

人告知約無故不赴者以過惡書仍罰銀一兩公用

一立約所於道里均平之處擇寺觀寬大者為之

一彰善者其辭顯而決糾過者其辭隱而婉亦忠厚之

道也如有人不弟毋直曰不弟但云聞某於事兄敬長

之禮頗有未盡某未敢以為信姑書之以俟凡糾過惡

皆例此若有難改之惡且勿糾使無所容或激而遂肆

其惡矣約長副等須先期陰與之言使當自首衆共誘

掖獎勸之以興其善念姑使書之使其可改若不能改

然後糾而書之又不能改然後白之官又不能改同約之人執送之官明正其罪勢不能執戮力協謀官府請兵滅之

一通約之人凡有危疑難處之事皆須約長會同約之人與之裁處區畫必當於理濟於事而後已不得坐視推託陷人於惡罪坐約長約正諸人

一寄庄人戶多於納糧當差之時躲回原籍往往負累同甲今後約長等勸令及期完納應承如蹈前弊告官

懲治削去寄庄

一本地大戶異境客商放債收息合依常例毋得磊算或有貧難不能償者亦宜以理量寬有等不仁之徒輒便捉鎖磊取挾寫田地致令窮民無告去而為之盜今後有此告諸約長等與之明白償不及數者勸令寬捨取已過數者力與追還如或恃強不聽率同約之人嗚之官司

一親族鄉鄰往往有因小忿投賊復讐殘害良善釀成

大患今後一應鬪毆不平之事鳴之約長等公論是非
或約長聞之即與曉諭解釋敢有仍前妄為者率諸同
約呈官誅殄

一軍民人等若有陽為良善陰通賊情販買牛馬走傳
消息歸利一已殃及萬民者約長等率同約諸人指實
勸戒不悛呈官究治

一吏書義民總甲里老百長弓兵機快人等若攬差下
鄉索求賫發者約長率同呈官追究

一各寨居民昔被新民之害誠不忍言但今既許其自新所占田產已令退還毋得再懷前讐致擾地方約長等常宜曉諭令各守本分有不聽者呈官治罪

一投招新民因爾一念之善貸爾之罪當痛自克責改過自新勤耕勤織平買平賣思同良民無以前日名目甘心下流自取滅絕約長等各宜時時提撕曉諭如踵前非者呈官懲治

一男女長成各宜及時嫁娶往往女家責聘禮不充男

家責嫁裝不豐遂致愆期約長等其各省諭諸人自今其稱家之有無隨時婚嫁

一父母喪葬衣衾棺槨但盡誠孝稱家有無而行此外或大作佛事或盛設宴樂傾家費財俱於死者無益約長等其各省諭約內之人一遵禮制有仍蹈前非者即與糾惡簿內書以不孝

一當會前一日知約預於約所灑掃張具於堂設告諭牌及香案南向當會日同約畢至約贊鳴鼓三衆皆詣

香案前序立北面跪聽約正讀告諭畢約長合衆揚言
曰自今以後凡我同約之人祇奉戒諭齊心合德同歸
於善若有二三其心陽善陰惡者神明誅殛衆皆曰若
有二三其心陽善陰惡者神明誅殛皆再拜興以次出
會所分東西立約正讀鄉約畢大聲曰凡我同盟務遵
鄉約衆皆曰是乃東西交拜興各以次就位少者各酌
酒於長者三行知約起設彰善位於堂上南向置筆硯
陳彰善簿約贊鳴鼓三衆皆起約贊唱請舉善衆曰是

在約史約史出就彰善位揚言曰某有某善某能改某過請書之以為同約勸約正遍質於衆曰如何衆曰約史舉甚當約正乃揖善者進彰善位東西立約史復謂衆曰某所舉止是請各舉所知衆有所知即舉無則曰約史所舉是矣約長副正皆出就彰善位約史書簿畢約長舉杯揚言曰某能為某善某能改某過是能修其身也某能使某族人為某善改某過是能齊其家也使人人若此風俗焉有不厚凡我同約當取以為法遂屬

於其善者善者亦酌酒酬約長曰此豈足為善乃勞長者過獎某誠惶忤敢不益加砥礪期無負長者之教皆飲畢再拜謝約長約長答拜興各就位知約撤彰善之席酒復三行知約起設糾過位於階下北向置筆硯陳糾過簿約贊鳴鼓三衆皆起約贊唱請糾過衆曰是在約史約史就糾過位揚言曰聞某有某過未敢以為然姑書之以俟後圖如何約止遍質於衆曰如何衆皆曰約史必有見約止乃揖過者出就糾過位北向立約史

復遍謂衆曰某所聞止是請各言所聞衆有所聞即言無則曰約史所聞是矣於是約長副正皆出糾過位東西立約史書簿畢約長謂過者曰雖然姑無行罰惟速改過者跪請曰某敢不服罪自起酌酒跪而飲曰敢不速改重為長者憂約正副史皆曰某等不能早勸諭使子陷於此亦安得無罪皆酌自罰過者復跪而請曰某既知罪長者又自以為罰某敢不即就戮若許其得以自改則請長者無飲某之幸也趨後酌酒自罰約正副

咸曰子能勇於受責如此是能遷於善也某等亦可免
於罪矣乃釋爵過者再拜約長揖之興各就位知約撤
糾過席酒復三行遂飯飯畢約贊起鳴鼓三唱申戒衆
起約正中堂立揚言曰嗚呼凡我同約之人明聽申戒
人孰無善亦孰無惡為善雖人不知積之既久自然善
積而不可掩為惡若不知改積之既久必至惡極而不
可赦今有善而為人所彰固可喜苟遂以為善而自恃
將日入於惡矣有惡而為人所糾固可愧苟能悔其惡

而自改將日進於善矣然則今日之善者未可自恃以
為善而今日之惡者亦豈遂終於惡哉凡我同約之人
盍共勉之衆皆曰敢不勉乃出席以次東西序立交拜
興遂退

旌獎節婦牌

訪得吉水縣民人陳文繼妻黃氏廬陵縣生員胡充妻
曾氏俱各少年守制節操堅厲遠近傳揚士夫稱嘆當
茲風俗頹靡之時合行旌獎以勵澆薄為此仰府官吏

即行吉水廬陵二縣掌印官支給無礙官錢買辦禮儀
前去各家盛集鄉鄰老幼之人宣揚本婦志節之美務
使姻族知所崇重里巷知所表式用獎貞節以激偷鄙
仍備述各婦節操志行始末及將獎勵過緣由同依准
隨牌繳報以憑施行

興舉社學牌

看得贛州社學鄉館教讀賢否尚多淆雜是以詩禮之
教久已施行而淳厚之俗未見興起為此牌仰嶺北道

督同府縣官吏即將各館教讀通行訪擇務學術明正
行止端方者乃與茲選官府仍籍記姓名量行支給薪
米以資勤苦優其禮待以示崇勸其各童生之家亦各
通行戒飭務在隆師重道教訓子弟毋得因仍舊染習
為偷薄自取愆咎

頒定里甲雜辦

據龍南縣申稱先年里甲使用俱係丁糧分派照日應
當以致多寡不均要將正德十六年里甲通行查審除

逃絕人丁外將一年使用春秋祭祀軍需歲報使客夫馬等項俱於丁糧議處每石出銀若干陸續稱收貯庫推舉老人公同里長使用註簿儻有餘剩照多寡給還等因到院簿查先該贛州府知府盛茂同知夏克義議過贛縣里長額辦雜辦已經批仰嶺北道再加酌議續據副使王度呈稱查算本縣額辦使用該銀三千七百三十一兩七分二釐四毫九絲原轄里長一百一十里內除十里逃絕止有一百里十六年分每糧一石算一

分人丁二丁算一分一年丁糧共該一千一百二十六分半每分該出銀三兩三錢一分二釐一毫一絲一忽合行該縣印鈐收銀文簿一扇將各都該辦銀兩分為二次查追貯庫又置文簿二扇一寫本縣支出數目一發支用人役註附每月選有行止老人二名公同直日里長赴縣支領每月備具用過揭帖三本一送都察院一分巡道一本府各不時稽察年終羨餘並聽上司查處以補無名徵需府縣不得擅支仍將各里該納分數

刷印告諭遍張鄉村曉諭如有官吏額外科派及收銀人役多取火耗秤頭并里甲恃頑不辦許各呈告以憑掣問呈乞照詳又經批仰照議即行該縣永永查照仍備刻告示遍行曉諭及多行刷印頒給各里收照以防後奸今申前因看與本院新定則例相同及照寧都等九縣及南安所屬大庾等縣事體民情當不相遠合就通行查編為此仰抄案回道即便速行各縣俱查本院近定規則各照丁糧多寡派編銀兩追收貯庫選委行

止端實老人公同該日里長支用置簿稽察刊榜曉諭
禁約事宜悉照原議施行敢有違犯者就使拏問呈詳
通取各縣派定過緣由類報查考

批江西布政司設縣呈

據江西布政司呈將新淦縣知縣田邦傑建言設縣緣
由看得近來各處設縣皆因窮山絕谷盜賊盤據人迹
罕通聲教不及不得已而為權宜之計若腹裏平衍四
通五達之區止宜減并不貴增添蓋增一縣即增一縣

之事官吏供給學校倉庫圜獄差徭一應煩費未易悉
舉且又有彼此推避之奸互相牽制之患計其為利不
償所害古人謂省吏不如省官省官不如省事凡今作
事貴在謀始仰布政司再行會同二司各官從長計議
設縣之外果無別策可以致理具議呈奪繳

議處官吏廩俸

照得近來所屬各州縣衙所倉場等衙門大小官吏以
贓問革者相望而冒犯接踵究詢其由皆云家口衆多

日給不足俸資所限本以涼薄而近例減削又復日甚
加有上下接應之費出入供送之繁窮窘困迫計出無
聊中間亦有甘貧食苦刻勵自守者往往狼狽藍縷至
於任滿職革債負纏結不得去歸其鄉夫貪墨不才法
律誠所難貸而其情亦可矜憫夫忠信重祿所以勸士
在昔任人既富方穀庶民在官祿足代耕此古今之通
義也朝廷賦祿百司厚薄既有等級要皆使各裕其資
養免其內顧然後可望以盡心職業責以廉恥節義今

定制所限既不可得而擅增至於例所應得又從而裁
削之使之仰事俯育且不能遂是陷之於必貪之地而
責之以必廉之守中人之資將有不能而况其下者之
衆乎所據前項事理非獨人情有所未堪其於政體亦
有所損合行會議查處叅酌事理輕重及查在外官員
自二品至九品并雜職吏胥等俸米除本色外其折色
原例每石作銀若干於何年月裁減作銀若干應否復
舊或量行加增務要議處停當呈來定奪施行

咨六部伸理冀元亨

照得湖廣常德府武陵縣舉人冀元亨忠信之行孚於遠邇孝友之德化於鄉閭本職往年謫官貴州本生曾從講學近來南贛延之教子時因寧藩宸濠潛謀不軌虐焰日張本職封疆連屬欲為曲突徙薪之舉則既無其由將為發奸摘伏之圖則又無其實偶值宸濠飾詐要名禮賢求學本職因使本生乘機往見宸濠冀得因事納規開陳大義沮其邪謀如其不可勸喻亦因得以

審察動靜知其叛逆遲速之機庶可密為禦備本生既與相見議論大相矛盾宸濠以本職所遣一時雖亦含忍遣發而毒怒不已陰使惡黨四出訪緝欲加陷害本生素性愿恪初不之知而本職風聞其說當遣密從間道潛回常德以避其禍後宸濠既敗痛恨本職起兵攻剿雖反噬之心無所不至而天理公道所在無因得遂其奸乃以本生係本職素所愛厚之人輒肆詆誣謂與同謀將以泄其讐憤且本生既與同謀則宸濠舉叛之

日本生何故不與共事却乃反回常德聚徒講學宸濠素所同謀之人如李士實劉養正王春之流宸濠曾不一及而獨口稱本生與之造始此其挾讐妄指盖有不待辯說行道之人皆能知者但當事之人不加詳察輒爾聽信遂陷本生一至於此本生篤事師之義懷報國之忠蹈不測之虎口將以轉化凶惡潛消奸宄論心原迹尤當顯蒙賞錄乃今身陷俘囚妻子奴虜家業蕩盡宗族遭殃信奸人之口為叛賊泄憤報讐此本職之所

為痛心刻骨日夜冤憤而不能自己者也本職義當與
之同死幾欲為之具奏伸理而本生雖在拘囚傳聞不
一或以為既釋或以為候旨兼慮當事之人或不見諒
反致激成其罪故復隱忍到今又恐多事紛紜之日萬
一玉石不分竟使忠邪倒置徒以沮義士之志而快叛
賊之心則本職後雖繼之以死將亦無以贖其痛恨為
此合行具咨貴部煩請咨詢鑒察特賜扶持分辨施行

獎勵主簿于旺

看得近來所屬下僚鮮能持廉守法訪得興國縣主簿于旺獨能操持清白處事詳審近委管理抽分纖毫無玷奸弊剗革撫屬小官之內誠不多見相應獎勵以勸其餘為此牌仰官吏即便支給商稅銀兩買辦花紅彩段羊酒各一事并將本院發去官馬一匹帶鞍一付備用鼓樂差官以禮送付本官用見本院獎勵之意

申諭十家牌法

本院所行十家牌諭近來訪得各處官吏類多視為虛

文不肯著實奉行查考據法即當究治尚恐未悉本院
立法之意故今特述所以再行申諭凡置十家牌須先
將各家門面小牌挨審的實如人丁若干必查某丁為
某官吏或生員或當某差役習某技藝作某生理或過
某房出贅或有某殘疾及戶籍田糧等項俱要逐一查
審的實十家編排既定照式造冊一本留縣以備查考
及遇勾攝及差調等項按冊處分更無躲閃脫漏一縣
之事如視諸掌每十家各令挨報甲內平日習為偷竊

及喇唬教唆等項不良之人同具不致隱漏重甘結狀
官府為置舍舊圖新簿記其姓名姑勿追論舊惡令其
自今改行遷善果能改化者為除其名境內或有盜竊
即令此輩自相挨緝若係甲內漏報仍并治同甲之罪
又每日各家照依牌式輪流沿門曉諭覺察如此即奸
偽無所容而盜賊亦可息矣十家之內但有爭訟等事
同甲即時勸解和釋如有不聽勸解恃強凌弱及誣告
他人者同甲相率稟官官府當時量加責治省發不必

收監淹滯凡遇問理詞狀但涉誣告者仍要查究同甲
不行勸稟之罪又每日各家照牌互相勸諭務令講信
修睦息訟罷爭日漸開導如此則小民益知爭鬪之非
而詞訟亦可簡矣凡十家牌式其法甚約其治甚廣有
司果能著實舉行不但盜賊可息詞訟可簡因是而修
之補其偏而救其弊則賦役可均因是而修之連其伍
而制其什則外侮可禦因是而修之警其薄而勸其厚
則風俗可淳因是而修之導以德而訓以學則禮樂可

興凡有司之有高才遠識者亦不必更立法制其於民情土俗或有未備但循此而潤色修舉之則一邑之治真可以不勞而致今特畧述所以立法之意再行申告言之所不能盡者其各為我精思熟究而力行之毋徒紙上空言搪塞竟成掛壁之虛文則庶乎其可矣

申諭十家牌法增立保長

先該本院通行撫屬編置十家牌式為照各甲不立牌頭者所以防脅制侵擾之弊然在鄉村遇有盜賊之警

不可以無統紀合立保長督領庶衆志齊一為此仰抄
案回司即行各道守巡兵備等官備行所屬各府州縣
於各鄉村推選才行為衆信服者一人為保長專一防
禦盜賊平時各甲詞訟悉照牌諭不許保長干與因而
武斷鄉曲但遇盜警即仰保長統率各甲設謀截捕其
城郭坊巷鄉村各於要地置鼓一面若鄉村相去稍遠
者仍起高樓置鼓其上遇警即登樓擊鼓一巷擊鼓各
巷應之一村擊鼓各村應之但聞鼓聲各甲各執器械

齊出應援俱聽保長調度或設伏把隘或并力夾擊但有後期不出者保長公同各甲舉告官司重加罰治若鄉村各家皆置鼓一面一家有警擊鼓各家應之尤為快便此則各隨才力為之不在牌例之內俱仰督令各縣即行推選增置仍告諭遠近使各知悉各府仍要不時稽察務臻實效毋得虛文搪塞查訪得出定行究治不貸

頒行社學教條

先該本院據嶺北道選送教讀劉伯頌等頗已得人但多係客寓日給為難今欲望以開導訓誨亦須量資勤苦已經案仰該道通加禮貌優待給薪米紙筆之資各官仍要不時勸勵敦勉令各教讀務遵本院原定教條盡心訓導視童蒙如己子以啓迪為家事不但訓飭其子弟亦復化喻其父兄不但勤勞於詩禮章句之間尤在致力於德行心術之本務使禮讓日新風俗日美庶不負有司作興之意與士民趨向之心而凡教授於茲

土者亦永有光矣仍行該縣備寫案驗事理揭置各學
永遠遵照去後今照前項教條因本院出巡忙迫失於
頒給合就查發為此牌仰本道府即將發去教條每學
教讀給與二張揭置座右每日務要遵照訓誨諸生該
道該府官員亦要不時親臨激勵稽考毋得苟應文具
遂今日就廢弛

清理永新田糧

據叅議周文光呈者得江西田糧之弊極於永新相傳

已非一日今欲清理丈量實亦救時切務但恐奉行不
至未免反滋弊端依議定委通判談儲推官陳相指揮
高睿會同該縣知縣翁璣設法丈量該道仍要再加區
畫曲盡物情務仰各官秉公任事正已格物殫知竭慮
削弊除奸必能一勞永逸方可發謀舉事如其虛文塞
責則莫若熟思審處以俟能者事完之日悉照該道所
議造冊永永遵守施行繳

批寧都縣祠祀知縣王天與申

據寧都縣申者得知縣王天與舊隨本院征剿橫水桶岡諸賊屢立戰功後隨本院討平寧藩竟死勤事況其平日居官政務修舉威愛兼行仰該縣即從士民之請建祠報祀用伸士夫之公論以慰小民之遺思

曉諭安仁餘干頑民牌

正德十五年二月

照得安仁餘干各有梗化頑民數千餘家近住東鄉逃避山澤沮逆王化已將數年即其罪惡俱合誅夷無赦但本院撫臨未及况查本院新行十家牌諭各官因各

民頑梗尚未編查若遽行擒剿似亦不教而殺為此牌
仰撫州府同知陸倅督同東鄉縣知縣黃堂及安仁縣
知縣汪濟民餘干縣知縣馬津親詣各村都沿門挨
編推選父老子弟知禮法者曉諭教飭令各革心向化
自求生路限在一月之內仇者釋其怨憤者平其心逋
者歸其負罪者伏其辜具由呈來仍舊待以良善若過
限不改不必再加隱恣姑息徒益長奸縱惡即便密切
指實申來以憑別有區處施行

告諭頑民

十二月十五日

告諭安仁餘干東鄉等縣父老子弟自本院始至江西即聞三縣間有頑梗背化之民數千家其時本院方事剿平閩廣湖柳諸蠻寇且所治止於南贛政教有所未及自去歲征討逆藩朝廷復有兼撫是方之命隨因聖駕南巡奔走道路故亦未遑經理今復還省城備詢三司府縣各官及遠近士夫軍民皆謂爾民梗化日久積惡深重已在必誅無赦夫朝廷威令雷厲風行於九夷

八蠻之外而中土郡縣之民乃敢悖抗若此不有誅滅以示懲戒亦將何以為國欲即發兵剿捕顧其間尚多良善恐致玉石無辨且前此有司所以處之亦有未善何者安仁餘千里分本少於東鄉而地勢又限以山谷顧乃割小益大以啓爾民規避之端其失一矣既而兩邑之民徭賦不平爭訟競起其時若盡改復舊亦有何說顧又使其近東鄉者歸安仁近安仁者附東鄉以益爾民紛爭之謗其失二矣及爾等抗拒之迹既成尚當

體悉爾等中間或有難忍之怨屈抑不平之情亦須為之申泄斷理或懲或戒使兩得其平若終難化喻者即宜斷然正以國法顧乃憚於身任其勞一切惟事姑息欲逃租賦遂從而免其租賦欲逃逋債遂從而貸其逋債於彼則務隱忍之政而聽其外附於此又信一偏之詞而責其來歸紀綱不立冠履倒置長奸縱惡日增月熾以成爾民背叛之罪而陷之必死之地其失三矣然爾等罪惡皆在本院未臨之前自本院撫臨以來尚未

曾有一言開諭爾等况查本院新行十家牌諭以弭盜
息訟勸善糾惡而各該縣官又因爾等恃頑梗化皆未
曾編查曉諭爾等皆未知悉其間或有悔創自新之願
亦未可知若遽行擒剿是亦不教而殺雖爾等在前之
惡受此亦不為過然於吾心終有所未盡也近日撫州
同知陸倅來稟爾等尚有可憫之情各懷求生之願故
特委同知陸倅親齎本院告諭往諭爾等父老子弟因
而查照本院十家牌式通行編排曉諭使各民互相勸

戒糾察痛懲已往之惡共為維新之民爾等父老子弟其間知識明達者蓋亦深思熟慮之世豈有不納糧不當差與官府相對背抗而可以長久無事終免於誅戮者乎世豈有恃頑樹黨結怨構仇劫衆拒捕不伏其辜而可以長久無事終免於誅戮者乎就使爾等各有子弟奴僕與爾抗拒背逆若此爾等當何以處之夫寧王宸濠挾奸雄之資藉宗室之勢謀為不軌積十餘年誘聚海內巨寇猾賊動以萬計奮其財力甲兵之強自以

為無敵於天下矣一旦稱亂舉事本院奉朝廷威令興
一旅之師不旬日而破滅之如虜正雖爾輩縱頑梗克
悍自視以為孰與宸濠吾若聲汝之罪不過令一偏裨
領衆數百立齏粉爾輩如机上肉耳顧念爾等皆吾赤
子其始本無背叛之謀止因規利爭忿肆惡長奸日迷
日陷遂至於此夫父母之於子豈有必欲殺之心惟其
悖逆亂常之甚將至於覆宗滅戶不得已而後置之法
苟有改化之機父母之心又未嘗不欲生全之也前此

官府免爾租稅蠲爾債負除爾罪名而遂謂爾可以安居復業是終非所以生汝吾今則不然不免爾租賦不蠲爾債負不除爾罪名爾能聽吾言改惡從善惟免爾一死限爾一月之內釋怨解仇逃稅者輸其賦負債者償其直有罪者伏其辜吾則待爾如故爾不聽吾言任汝輩自為之吾心既無不盡吾可以無憾矣爾後無悔

批江西都司掌管印信

看得三司各官推舉該衛所掌印僉書等官頗已得宜

俱依議仰行按察司將本院原發貯庫印信者驗明白
照議給領掌管茲當該衛改革之初仍行各官務在圖
新更始端本澄源共惟同心同德之美以立可久可大
之規不獨顯功業於當時必欲垂模範於來裔上不負
廟堂之特選而下可副諸司之舉任其或庸碌浮沉甚
至欺公剝下豈徒敗其身名亦難免於刑憲其餘空閒
各官觀其才識皆可器使但以缺少人多未及盡用各
官惟務持身勵志藏器待時但恐見用而無才勿慮有

才而未用若果囊中之錐無不脫穎而出毋謂上人不
知輒自頽靡是乃自棄非人棄汝矣俱仰備行各官查
照施行

牌行崇義縣查行十家牌法

看得新開崇義縣治雖經本院委官緝理經畫大畧規
模已具終是草創之初經制未習該縣官員若不假以
威權聽其從宜整理則招徠安習之功亦未可責效除
行守巡兵備等衙門外牌仰知縣陳瓚上緊前去該縣

首照十家牌諭查審編排連屬其形勢輯睦其鄰里務
要治官如家愛民如子一應詞訟差徭錢糧學校等項
俱聽因時就事從宜區處應申請者申請應興革者興
革務在畜衆安民不必牽制文法大抵風土習尚雖或
有異而天理民彝則無不同若使為縣官者果能殫其
心力悉其聰明致其惻怛愛民之誠盡其撫輯教養之
道雖在蠻貊無不可化況此中土郡縣之區向附新民
本多善類我能愛之如子彼亦焉有不愛我如父者乎

夫仁慈以惠良善刑罰以鋤克暴固亦為政之大端若此新民之中及各縣分割都圖人戶果有頑梗強橫不服政化者即仰遵照本院欽奉勅諭事理具由申請即行擒拏治以軍法毋容縱恣益長刁頑

牌諭都指揮馮勳等振旅還師

牌諭都指揮馮勳通判林寬典史徐誠等本月二十一日據知縣熊价所稟已知安義叛賊畧平所漏無幾俟餘黨一盡各官即行振旅而還就將所擒叛賊通行宰

固綁縛分領解赴軍門各官在途務要肅整行伍申嚴
紀律禁緝軍兵不得犯人一草一木今差叅隨官詹明
賫執各官原領令旗令牌監軍而回但有違令侵擾於
人者即行斬首示衆其奮命當先被殺被傷義勇之士
及獲功人役各官務要從公從實開報以憑優恤給賞
不得互分彼此輒有偏私輕重但能推功讓美者勤勞
雖微亦在褒賞若有爭功專利者功績雖茂亦從擯抑
其奉新兵快往年從征多犯禁令今既効有勤勞尤宜

保全始終毋蹈前非自取軍法重罪知縣能价不必解
賊且可在縣撫安被擾軍民令各安居樂業既行申嚴
十家牌諭互相保障仍量留九姓義勇分班守縣候事
體定帖以漸散回

批瑞州知府告病申

看得知府胡堯元始以忠義興討賊之功繼以剛果著
及民之政雖獲上之誠或有未孚而守身之節初無可
議據申告病情由亦似意有所為大抵能絜矩者必推

已及人當大任者在動心忍性仰布政司即行本官照
舊盡心管理府事毋因一朝之忿遂忘三反之功事如
過激欲抗彌卑理苟不渝雖屈匪辱此繳

賑恤水災牌

據南康建昌撫州宜黃等縣申稱非常水災乞賜大施
賑恤急救生靈流移等情看得橫水非常下民昏墊實
可傷憫但計府縣所積無多實難溥賑其地方被水既
廣而民困朝不謀夕若候查實報名造冊給散未免曠

日遲久反生冒濫已行二府各委佐貳官及行所屬被
水各縣掌印等官用船裝載穀米分投親至被水鄉村
驗果貧難下戶就便量行賑給為照南昌所屬水災尤
劇但居民稠雜類多頑梗若賑給之時非守巡臨督於
上或致騰踴紛爭為此仰分守巡南昌官吏即便分督
該府縣官於預備倉內米穀用船裝運親至被水鄉村
不必揚言賑饑專以踏勘水災為事其間驗有貧難下
戶就便量給升斗暫救目前之急給過人戶畧記姓名

數目完報查考不必造冊擾害所至之地就督各官申嚴十家牌諭通加撫慰開導令各相安相恤仍督各官俱要視民如子務施實惠不得虛文搪塞徒費錢糧無救民患取罪不便

仰湖廣布按二司優恤冀元亨家屬

照得湖廣常德府武陵縣舉人冀元亨忠信之行孚於遠邇云云已經備咨六部院寺等衙門詳辦去後今照冀元亨該科道等官交章申暴各該官司辦無干碍先

已釋放不期復染瘧痢身故該部司屬官員及京師賢士大夫莫不痛悼相與資給衣棺本院亦已具舟差人扶柩歸葬但恐本生原籍官司一時未知詳悉仍將家屬羈監未免枉受淹禁除將本生節義另行具本奏請褒錄外擬合通行為此牌仰抄案回司即行常德府速將舉人冀元亨家屬通行釋放財產等項亦就查明給還收管仍將本生妻子特加優恤使奸人知事久論定之公而善類無作德降殃之感其於民風士習不為無

補矣

批江西按察司故官水手呈

看得僉事李素處心和易居官清謹生既無以為家死復無以為斂寡妻弱妾旅櫬萬里死喪之哀實倍恒情該司議欲加撥長夫水手護送非獨僚友之情實亦惇廉周急之義准議行令各府僉撥長夫水手照例起關差人護送還鄉

仰南康府勸留教授蔡宗充

據南康府儒學申看得教授蔡宗充德任師儒心存孝義今方奉慈母而行止可樂英才之化況職主白鹿當宋儒倡道之區勝據匡廬又昔賢棲隱之地偶有親疾自可將調輒興掛冠之請似違捧檄之心仰布政司備行南康府掌印官以禮勸留仍與脩葺學宮供給薪水稍厚養賢之禮以見崇儒之意繳

批江西布政司禮送致仕官呈

據江西布政司呈查勘新建知縣李時告送僉事李素

喪歸雲南任內無礙緣由看得知縣李時所呈量才能而知止已見恬退之節因友喪而求去尤見交誼之敦既經查勘明白亦合遂其高致仰司即行該府聽令本官以禮致仕動支無礙官銀置備綵帳羊酒從厚送餞加撥長夫水手資送還鄉該司仍將本官致仕緣由行原籍官司用彰行誼之美以為風俗之勸繳



王文成全書卷十七